



Posta da Beirut da l'artista Pia Valär arrivada en chasa rumantscha cun il collavuratur da l'ambassada svizra a Beirut, Chasper Sarott.

Sonda Lunga en Chasa rumantscha

■ (anr/ac) Fitg cuntenta è la Lia Rumantscha cun il dumber da visitaders sa deditgads a la spierta da la Sonda Lunga en chasa rumantscha a Cuira. La Lia è sa participada per la segunda giada sco giast a la dieschavla ediziun da la Sonda Lunga cun dudesch uras cultura da tut gener en 21 chasas ed instituziuns. L'ustaria dad Anny, in teater musical per ina ustiera e dus e mezs chantadurs, è stada in dals puncts culminants da la purschida da la Lia Rumantscha en chasa rumantscha a Cuira. Anny Weiler sco ustiera ed ils chantadurs Chasper Curò Mani e Daniel Betz accompagnads da Risch Biert al piano han delectà il publicum e demonstrà lur abilitads musicalas persavadentas cun midar senza interrupziun da la chanzun populara en la classica e da rock enfin enconuschantas melodias da musicals. Anny Weiler è sa preschentada ina ulteriura giada al publicum cun ina band e chant da jazz e sper il daletg musical han ils ustiers da l'Hotel Posti-

gliuin, Corina e Guido Sgier, survì lur tragas per ina giada a Cuira en chasa rumantscha enstagl ad Andiastr en l'agen hotel. Sper l'exposiziun da Pia Valär cun sia posta da Beirut han visitadras e visitaders dastgà emprender d'enconuscher la chasa rumantscha sezza. L'istoricher d'art Leza Dosch ha explitgà ils detagls dal bajetg che datescha da l'onn 1860 e per ils uffants ha Anna Mengiardi raquintà istorgias da Luisa e Nic ed ulteriurs protagonistis. Andreas Gabriel da la Lia Rumantscha è s'exprimi fitg cuntent cun il dumber da visitadras e visitaders en chasa rumantscha ed è stà intimà da la atmosfera da festa. Circa 600 entradas ha la Lia Rumantscha nudà durant la Sonda Lunga. Ina Sonda Lunga che ha festivà ses dieschavel anniversari cun ina purschida vasta e da different gener en betg main che 21 chasas ed instituziuns. Ellas han purschi cultura durant dudesch uras en l'entira citad da Cuira. Da la partida è era stà RTR cun agen program en atgna chasa.



Leza Dosch ha fatg attent als detagls da l'architectura da la chasa rumantscha.



Ha procurà per ils tuns da jazz: Anny Weiler tranter auter cun il sustegn da Rees Coray.



Il post dal presidi da la Lia Rumantscha enconuscha era varts pli empernavilas. Johannes Flury circumdà da scharmantas collavuraturas da la Lia.



Il daletg culinaric è derivà dals ustiers Corina (amez) e Guido Sgier cun sustegn dal personal.



Chasper Curò Mani (a san.) e Daniel Betz en l'ustaria dad Anny.



Ils uffants èn stads fascinads da las istorgias dad Anna Mengiardi.